

Proposta OJE 2023 Aprovadu ho montante Billiaun \$3,1.

Kapital Sosial Hetan Alokasaun 36%, Programa Nutrisaun millaun \$10

Díli, 15 Setembru 2022 – Ministru Finansas, Rui Augusto Gomes, horiseik apresenta ba Konsellu Ministrus no hetan ona aprovasaun, Proposta Projetu Lei Orsamentu Jerál Estadu (OJE) tinan 2023 ho montante total billiaun \$3,1 ne'ebé Governu sei distribui ba Entidades Estadu hamutuk 109 ne'ebé mak hola parte iha perimetru orsamentál 2023.

Montante global billiaun \$3,1 ne'e hetan redusaun 8% ka millaun \$264 kompara ho OJE Retifikativu 2022.

Total despesas global billiaun \$3,1 kompostu husi Orsamentu Administrasaun Sentral billiaun \$2,8 (montante ne'e inklui ona Fundu Kombatentes Libertasaun Nasionál, billiaun \$1). Orsamentu Seguransa Sosial hetan alokasaun millaun \$235,7 no RAEOA millaun \$120. Montante despesas global iha PPL OJE 2023 hanesan mos ho montante despesas global iha Lei das Grandes Opções do Plano 2023 ne'ebé mak Prezidente Republika, [José Ramos-Horta](#) promulga ona iha fulan-juñu liubá.

Proposta orsamentu 2023 ne'e sei uza hodi finansia Programa 49 ho medidas prinsipál 275, organizadu iha área estratéjiku 16: Agrikultura, Pekuária, Peskas no Floresta; Ekonomia no Empregu; Turizmu; Dezenvolvimentu Rural no Abitasaun; Ambiente; Petróleu no Minerál; Eletridade no Enerjia Renovável; Konektividade Nasionál; Bee no Saneamentu; Edukasaun no Formasaun; Saúde; Inklusaun no protesaun Sosial; Kultura no Patrimóniu; Reforma Estadu; Defeza no Seguransa Nasionál; Relasaun Internasionál no Política Esterna.

Setór Kapital Sosial Hetan Alokasaun 36%

Distribuisaun Tetu Agregadu Orsamentu Administrasaun Sentral iha OJE 2023 bazeia ba setór importante sira iha Planu Estratéjiku Dezenvolvimentu: Setór Kapital Sosial inklui Saúde, Edukasaun no Protesaun Sosial hetan alokasaun millaun \$771,7 ka 36%. Tuir kedan ho Setór Kuadru Institusionál ho orsamentu alokadu millaun \$706,1 ka 33%. Dezenvolvimentu Infraestrutura ho orsamentu alokadu millaun \$380,3 ka 18% no Dezenvolvimentu Ekonómiku ho orsamentu alokadu millaun \$230,6 ka 11%.

Programa Nutrisaun Hetan Alokasaun Orsamentu millaun \$10

Iha Proposta OJE 2023, Governu mos propoin ba Parlamentu Nasionál orsamentu ba Programa Nutrisaun ho montante millaun \$10. Ida-ne'e representa aumentu *quatro vezes* ka porsentu atus-haat (400%) kompara ho orsamentu alokadu ba programa Nutrisaun iha OJE 2022.

Submisaun PPL OJE 2023 ba Parlamentu Nasionál

Ho aprovasaun ne'e, ba oin Governu sei finaliza Livru sira OJE inklui Tabela sira no ofisialmente sei entrega PPL OJE 2023 ba Parlamentu Nasionál iha loron 3 fulan-outubru atu diskute no aprova iha fulan-novembru nia laran molok haruka ba Prezidente Republika atu tetu.

Kalendáriu ne'e tuir ona espíritu Lei Foun Enkuadramentu Orsamentál ne'ebé mak promulga husi Prezidente Republika, Francisco Guterres Lú-Olo iha fulan-fevereiru liubá. Lei estruturante ne'ebé sai nu'udar baze ida ba Reforma Jestaun Finanseira Públikas iha Timor-Leste – konkista importante ida ne'ebé mak Oitavu Governu Konstitusionál lideradu husi [Primeiro-Ministro: S.E. Taur Matan Ruak](#) halo durante nia mandat. ***